



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7

UEFA-i Cristiano Ronaldo tushitsü

Rara tempangtsü atema Zelensky-i Biden den sentong lemsateptsü

VOL. XXI ISSUE NO. 316 (ADOK 316) DIMAPUR YANGTEPNÜ (THURSDAY) LUROI (AUGUST) 29, 2024 ₹ 5.00

Political Affairs Committee-i NPI aser Frontier Nagaland Territory atema jembi

Kohima, August 28, 2024 (TYO): Nagaland sorkar Political Affairs Committee (PAC)-i tanü Nagaland nung tongtipang onük ana- Naga Political Issue aser Frontier Nagaland Territory atema jembiogo.

Tanep 11:00 ako nungi State Banquet Hall nung PAC senden tenzük aser nikongdang 4:30 ako meta ang tembanga liasü. Senden nung Chief Minister Neiphiu Rio aser MP ana aden ta Parliamentary Affairs Minister & government spokesperson K G Kenye-i ashi.

PAC senden mezüngbuba session nung Naga yimten tebilemstü atema jembi aser tongti kin hohotem aser civil society organizations den ajurutepa sendentem amentsü lemtet.

Nagaland nung CM Rio-i anir Opposition maliba sorkari November 2023 nung PAC on Naga Political Issue tenteta liasü.

"India sorkari NSCN-IM aser Working Committee, Naga National Political Groups na den olemtep

balala agia arur. Sendaktepa alir ajaki Naga telok balala külemi longjemtsü aser ka kümer olemteptsü shia aruaka tia maka parnok melongjemer" ta Kenye-i ashi.

"Centre sorkari NSCN-IM den Framework Agreement aser WC NNPGs den Agreed Position nung sign sütepogo saka Framework Agreement nung onük kar yimjak nung memetdaktüsü lir saka Agreed Position bo yimjak nung lemsatepogo" ta pai ashi.

Telok anaprongi balala noktaka ajanga Centre den olemtepa aruba nung tajangzük mangur aser iba ajanga yimten latettsü menur asütsü. Anungji state sorkari nübor teloktem, civil societies, kin hohotem aser loktitentet tongtitem den ajurutepa iba tebilemstü koktettsü asoshi parnok tenilemba angadangsüla ta PAC-i bilemer ta Kenye-i ashi.

Tesüiba nungbo PAC-i Naga olemteperem den ajurutepa tekaratiba nung yimten latettsü rongshia aru saka

tangbo onoki tamasa public taginüba metettsü ta pai shisem.

PAC-i Centre dang Naga yimtenren telok aika agizükba atema mepelaba shiogo. Tanü senden nung Naga political groups 26 lir ta onok dang ashi anungji Centre-i telok tasentem agizükba ya anentsüla ta Kenye-i ashi.

PAC-i Naga yimtenren teloktem dang telok tasen razüka aoba anentsü aser tang aliba teloktem longjemer ka akümtsü jembi arur, ta paisa shisem.

Asüng monsoon session tembanga anogo nung State Assembly-i Naga Political Issue benoka jembitsü saka bangzüngbo merenemtsü akok ta pai ashi.

PAC senden tanabuba session nung Centre aser Eastern Nagaland Peoples' Organisation (ENPO) tsünda Frontier Nagaland Territory akhangba indang benoka jembi.

ENPO nung ketdangpur tasen melentepba sülen parnoki PAC dang tang tashi olemtepa aruba osang lemsatep.

Centre-i ENPO akhangba angatetteptsü atema draft ka agütsüogo aser state sorkari tamasa Eastern Nagaland Legislators' Union den jembi sülen ang teinyaktsütem inyaka aotsü ta pai ashi.

"Tesüiba ENPO ketdangpurtemi parnok balala ser dang ali aser state sorkar den iba onük jembitsü memulung. Ajisüaka ketdangpur tasentem tanü Chief Minister den jembi aser Centre den senden amenba osang lemsatepogo" ta pai ashi.

ENPO ketdangpur telok taseni state sorkar den amalitep alitsü imlar aser iba ajanga tripartite talks tenzüka parnok khuret agientsü ta Kenye-i ashi.

NLPT Act 1989

State Cabinet-i Nagaland Liquor Total Prohibition Act of 1989 meyipa repringshitsü lemtetba anema civil societies aser arogotemi ola adokba ta nungdak mali, ta pai ashi.

"Ozüng nung temulung mesüi bilemra sorkari taginüba tongteta

inyaktsü asoshi ozüng meyipa repringshitsü mesüra tashitaitba kümdaktsütsü akok. Küm 30 tejakdang sorkari iba ozüng yanglu aser iba sülen taküm tashi tamakok ngua aruba angu. Sorkari ozüng tejen khen meyipa repringshitsü merangdang nungdak maliba ola adoktsü meimla" ta Kenye-i ashi.

NLPT Act indang alizüng metongtetba Nagaland nung yi ayokba menokdangtetba atema sorkari nübortem dang nungi tebilemba asüngdangtsü mechi Assembly nung 'matter of urgent public importance' ka ama benokogo, ta pai ashi.

"Iba ya Assembly nung benoka olemteptsü atema dang lir saka sorkar tebilembaji aibelena angatet aser telok aikati onsara talila jembi" ta Kenye-i ashi.

State sorkari nübor ajak den asüngdangtetba lemtet ka agitsü merangtsü. Anungji nübortem mebilemdangi ola madoktsü mepishir ta pai metetdaktüsü.

Anogo ananü atema NH 202 shibanger

Dimapur, August 28, 2024 (TYO): Longsa junction aser Dikhu Bridge tsünda anentsüh tulu ka alua lenmang shibanga lir.

NH 202 nung KM 14.00 (NH (Chare-New Chungliyimti-Meyilong-Longsa-Sewak Gate/Mokokchung) nung anentsüh alua lir anungji lenmang lapoktsü atema ananü shibangtsü ta Tuensang Deputy Commissioner

Lithrongla Tongpi Rutsa-i metetdaktüsügo.

August 29-30, 2024 tashi NH 202 shibangtsü anungji item anogotem tsünglanglen agüja aliba lenmangtem ajanga senzütsü laisa ashi.

1. *Trongar-Alisopur-Longmisa-Mokokchung.*

2. *Yangli/New Sangsotong-Yehemi-Suruhoto.*

Dy. CM Zeliang & Minister Kruse nati Dzüdza anentsüh semdang

Kohima, August 28, 2024 (TYO): Bodbamü Deputy Chief Minister T.R. Zeliang aser Women Resource Development and Horticulture minister Salhouuonuo Kruse nati NH-29 nung Dzüdza bridge anasa anentsüh alua aliba semdang.

TR Zeliang-i NHIDCL aser contractor tem dang state sorkari ghonda 72 tsünda lenmang lapoktsü tetuyuba agütsüba ama anentsüh yadoktsü aser lenmang lapoktsü nenshia metetdaktüsü.

"Iba ya alima lendong ka asünung shinga dak tai metongloksür. Ajisüaka NHIDCL aser contractor temi iba khuret asoshi söröki ia mebilemba atema tebilemstü abener" ta TR Zeliang-i NHIDCL ketdangsurtem, contractor tem aser Western Angami Public Organization (WAPO) tanishirtem den jembi dang ashi.

Sorkari quarterly monsoon preparedness senden nung tetuyuba agütsüba aser tebilemba lemsatepa ama NHIDCL aser contractor temi inyak asüba iba khuret ya kokteter alitsüba asü ta pai ashi.

"NHIDCL aser Contractor tem tsünda mangatettepa

ajanga mapa inyakba anen. Ano bangdak contractor-i nungdakba machineries aser nübo magütsüba ajanga mapang shitak nung anentsüh meindoktet" ta TR Zeliang-isa ashi.

"Nübortem timtemba mapang bangdak contractor-i tatemtsü onüktem amer tajangzük magitsüla. Contractor tem indang teinyaktsüji 'agreed term' nung lateta aliba ama inyaktsüla aser public asoshi tekaratiba nung machineries aser nübo teimba amshia lenmang lapoktsüla. Contractor-i mapa meinyakra NHIDCL-i notice agütsütsüla" ta paisa ashi.

Nagaland ama anentsüh khuret teti ajuruba tesem ka nung NHIDCL-i upgraded technology aser modern engineering bentsüla aser tarutsü nungbo lendong balala atema renema alitsüla ta TR Zeliang-isa metetdaktüsü.

Paisa Kohima Deputy Commissioner dang mapang shia senden mena mapa inyakba osang metetpelatsü tetuyuba agütsü.

NHIDCL-ia August 29 anüngdang tashi nung lenmang lapoktsü nangzükogo.

NLA question hour mapang tongtipang onük aika benok

Dimapur, August 28, 2024 (TYO): 14 buba Nagaland Legislative Assembly (NLA) indang pungububa session nung department balala nung Minister in-charge temi tasüngdangbatem langzüogo.

Mongulbarnü session tenzükba anogo nung NLA züngsem Kuzholuzo Nienu-i PMAY-G housing scheme nung beneficiary temi unit cost aser selection criteria indang asüngdanga liasü.

Idangji Rural Development Minister Metsubo Jamir-i unit cost ji 1,30,000 aser beneficiary telesa ana- SECC aser Awaas lir ta langzü.

Iba scheme ya 100% inyaker aser installment asem lemsar beneficiary indang bank account-i yoker ta Metsubo-i ashi.

Nienu-isa social media nung PMYA-G housing scheme indang tasüngdanga aika lir aser nisungntemi tang tashi nung beneficiary kwi yari ta metetnür ta ashidang "kobi melii beneficiary tem jangjashiba mapa inyaktsü" ta Metsubo-i langzü.

MLA Nienu-isa CSS kübok sen lemkütsüba aser Anganwadi Workers o helpers nem sen agütsüba metetnüa asüngdang. "Nagaland 2022-23 nung AWWs 398 aser AWWs 3980 liasü aser AWW shia nem Rs 500 aser AWW shia nem Rs 250 agütsüogo. Parnok rongnung AWWs 27 aser AWWs 46-i incentive angutsü temsüa liasü aser parnok nem direct beneficiary Transfer ajanga sen yokogo" ta Chief Minister Neiphiu Rio-i langzü.

2021-22 nung department-i App khuret ka ajanga iba scheme ajunga meinyaktet aser Ministry tetuyuba tasen ama senotsü agütsüba meyipa repringshio

asir temsüa aliba beneficiary ajaki incentive angutsü ta CM Rio-isa ashi.

MLA, Kuzholuzo-isa town councils nem machineries agütsüba indang metetnüa asüngdangdang "2018 nungi tang tashi JCB, Dumper, tractor, Tata mobile amala agüja arudar" ta CM aser Urban Development in charge Rio-i ashi.

Phek, Zunheboto aser Longleng town council nem mini truck agütsü aser Chumoikedima, Medziphema, Jalukie, Tseminyu, Tuli, Changtongnya, Pftusero aser Naginimira town council nem Tata mobiles agütsüogo. Town council shia nem agütsütsü lateta mali saka nungdakba repringer agütsür, ta Rio-i ashi.

MLA Kevipodi Sophie-i Lerie nungi Mao gate tashi National Highway 29 osang metetnüa asüngdangdang "technical fact-finding-i ano report magütsü lir" ta Deputy Chief Minister, TR Zeliang-isa ashi.

Lerie nungi Mao Gate tashi tang teinyakdak mapatong atema NHIDCL dang nungi document meshi aser August 14, 2024 nü technical fact finding committee ket tongogo. August 16 nü sendaktepa alirtem dang nungi osang tejangia meshiogo aser technical fact finding committee-i itenji bendendar, ta TR Zeliang-isa ashi.

Advisor Er. Kropol Vitsu-ia MLA Sophie pusema NH 29 nung tesenzü majung lir kechiyong standard & specification shitak meyanglu ta ashi.

"Tzünglu kanga aruba ajanga lenmang tamajungba kümogo anungji bangdakpurtemi technical survey asütsüla aser alinük asadanger ang mapatong inyaka aotsüla" ta Er. Kropol-isa ashi.

MLA, Nuklutoshi-i NH 702D, Mokokchung nungi Mariani lenmang yangluba onük benok.

"National Highway jenjang agüjaka kechiba two-lane expansion mapa metenzük" ta Nuklutoshi-i asüngdangdang "NH 702D nung 0.00 (Mokokchung) nungi Km 63.00 (Longtho) tashi short term maintenance inyakdar" ta Deputy CM aser PWD (National Highways) in charge T R Zeliang-isa langzü.

"NH702D two-lane extension atema Project Management Consultancy Services-i DPR ka renemdar aser Mokokchung nungi Watiyim (Km 0.00 to Km 70.00) tashi 2 laning with paved shoulder maparen tenzükogo" ta Zeliang-isa ashi.

Doyang bridge nungi VK Town tashi NH 2 two lane expansion metenzükba atema aser contractor osang metetnüa Nuklutoshi-isa asüngdangdang "July 3, 2023 nü mezüng contractor anentsüba ajanga iba mapa retender asütsüsa aküm aser June 18, 2024 nü mapatong tenzükba osang metetdaktüsü saka Landowners' Union NH-2 (VK Area)-i Land Compensation manguba ajanga mapa anenja lior. Iba mapa ya M/s Kaushal Sharma, Tinsukia, Assam nem lemkütsü" ta TR Zeliang-isa ashi.

Nuklutoshi-isa department-i ali melen temenok agütsüba ken o angatetteper asü masü ta asüngdangdang "NH 2 nung iba lenmang nung damage compensation dang dena lir aser ibaji agütsüogo saka land compensation maden" ta Zeliang-isa langzü.

Iba onük ya Chief Minister jenjang nung benoka jembi inyaktsüla ta Advisor Imkong L Imchen-ia tebilemba ka lemsatep.

State-level PM SvANidhi 'PRAISE' sempet agütsü



Capital Convention Centre, Kohima nung August 28, 2024 nü PM SvANidhi 'PRAISE' Award agütsüba sentong agidang Commissioner & Secretary, Urban Development & Municipal Department, Kekhrievor Kevichusa den ketdangsürtem, takok angur aser shilem agirtem külemi tangokba noksa nung angur.

Dimapur, Luroi/August 28 (TYO): Ministry of Housing and Urban Affairs (MoHUA) tawabangba kübok Urban Development & Municipal Department, Nagaland ajanga Capital Convention Centre, Kohima nung August 28, 2024 nü state-level PM SvANidhi 'PRAISE' (Performance Recognition for Access to Financial Inclusion and Street Vendors Empowerment) awards agütsüba sentong ka ayongzüka liasü.

Commissioner & Secretary, Kekhrievor Kevichusa, IPoS ajanga iba sentong ayongzüka nukjidorong rateta jembidang, dangar dak nungi alakteta takok anguba benjongtsü aser dangar tem ajungmesoa anidaktsü asoshi iba sentong ya ayongzü, ta ashi.

PM SvANidhi scheme yagi street vendors nem sen 10,000 tashi working capital loans agütsür. Iba scheme nung takok anguba mechi Ministry-i ano loan tabu ana tenzüka taoba mapang loan agia aliba takok ngua menokteter nem sen 20,000 aser 60,000 loan agütsütsü maongka agütsür.

Mezüngbo iba scheme yagi street vendors 50 lakh yaritsü nukjidorong nung tenzü, saka August 27, 2024 tashinung linük tesem balala nung loan sen 91.70 lakh agütsüogo, ta Kevichusa-i ashi.

Nagaland nung Urban Local Bodies (ULBs) 39 aliba nungi 25 nung loans agiogo. Hilly and North Eastern States tem rongnung Nagaland ya jenjang

8 buba nung liaka, 'target achievement percentage' tsütsü state-i kanga junga inyaktetogo. Success rates tajungba akumtsü atema ULBs aser sen aputsüba reju den lungjemer maneni inyaktar, ta pai metetdaksü.

Iba scheme nung Credit Guarantee Fund Trust for Micro and Small Enterprises (CGTMSE) teyari lir.

Ajisüaka sen aputsüba reju temi application magizükba/meyiptsüba rate tali aliba indang tebilemtsü Kevichusa-i lemsatop, koba shilem 38.75 lir.

Pai reju tem dang street vendors timba nem iba scheme agüja loan applications agizüktsü atema tali yakyaka inyakttsü ajungshia liasü.

Paisa ULBs indang Executive Officers, talisa loan magütsü aliba ULBs tilaba 14 nung street vendors nem awareness agüja item maongka agitsü asoshi yaritsü ayongzüka liasü.

Iba inyakyim nung yaritsü District Urban Development Agencies (DUDAs) renema lir, koba central schemes ti den sendaktepa lir.

State Mission Director, NLUM, SUDA, Peteville Khatau-i pela agizükba o jembidang, iba sentong yagi state, ULBs aser sen aputsüba reju temi meranga inyakba tali jangjadaktsür, ta ashi.

Tang tashinung state sorkari loans 4,047 tashi sanction süogo, ta pai metetdaksü.

Iba sentong nung MoHUA ajanga mulungba ama

institutions aser bank branches toku aser best-performing ULBs tenet tushia liasü.

Deputy Director, Kiniholi Kinimi-i sentong agütsüba mapang, August 2024 nung takok angur 831 nem tetushi agütsütsü nukjidorong nung state-level awards ceremony ya ayongzü, ta ashi.

Ministry-i Nagaland kübok yimti aser jila balala nung Best Performing Lending Institution ka, Best Performing Bank Branches ti aser best-performing ULBs tenet agizükogo.

Best Performing Lending Institution sempet ya State Bank of India nem agütsü aser Best Performing Bank Branches sempet ya Canara Bank, Dimapur; Indian Bank, Dimapur; State Bank of India, Dimapur; State Bank of India, Bazar, Dimapur; State Bank of India, Kiphire; State Bank of India, Old Market, Dimapur; State Bank of India Rangapahar, Dimapur aser State Bank of India, Tuensang nem agüja liasü.

Best Performing ULBs nung Category -I: Class I & II Cities sempet Dimapur Municipal Council nem agütsü, Category -II: Class III & IV Cities kübok Wokha Town Council, Mon Town Council, aser Tuensang Town Council nem agüja liasü.

Medziphema Town Council, Longleng Town Council aser Peren Town Council ya Category -III: Class II & IV Cities kübok agüja liasü.

DC Longleng-i JNV selection test atema metetdaksür

Dimapur, Luroi/August 28 (TYO): Jawahar Navodaya Vidyalaya (JNV) nung Academic Session 2025-2026 atema Class VI nung admission agitsü asoshi selection test ya Longleng aser Tamlu nung April 12, 2025 nü agitsü, ta Deputy Commissioner, Longleng, W. Manpai Phom,

NCS ajanga sangdong ka nung metetdaksü.

Iba dak sendakba nung application ya September 16, 2024 tashinung agütsütsüla.

Ward president/council chairmen ajungai iba osang ya pei aliba tesem nung prokshitsü metetdaksür, ta sangdong ajangasa ashi.

DPRO Dimapur Lolano Patton den tepila sentong agi



August 28, 2024 nü DPRO Office, Dimapur nung DPRO, Dimapur, Lolano Patton-i salem o jempiba noksa nung angur.

Dimapur, Luroi/August 28 (TYO): DPRO staff temi DPRO Dimapur menden yutsür Lolano Patton atema tepila sentong ka August 28, 2024 nü DPRO Office Dimapur nung ayongzüka liasü.

Lai iba sentong nung tepila o jembidang, la iba wadang nung tetsüng ajemoker inyaka arudang lai Deputy Commissioner toku kübok inyakogo aser iba mapang DPRO office staff anema ashishitep ken o kecha maruba atema tejak tenteta nokdaka lir aser item ajak ya staff temi tajungtiba nung inyakba ajanga lir, ta Lolano-i ashi.

La lenisüba kübok tongtoret ama nokdaka bendanga agütsür mapang shidak amshia mapa inuakba aser resources peria meliaka mapang shidak nung maparen ajak tembangba atema staff tem dang pelaba lemsatopa liasü.

Lai tesüiba mapang ajangshiba balala, talisa COVIDI pandemic mapang tayongzüka maparen balala takok ngua inyakba, bendanglen nungi nüburtem meyiba shilangdang train

station nung memejangi kazüba bilemteta ashi.

Ano district sports meet nung DPRO Dimapur team-i shilem agia tetsür football asayaba, arr atsütepba, Table Tennis aser badminton nung takok balala anguba lai menungra bilemteta jembi.

Item takok ya staff tem tanüla nung ka ama aser telungjem aliba ajanga lir, ta Patton-i ashi.

Tatem nung lai staff ajunga dang team ka ama lungjemer inyakttsü aser külemi takok benjongtsü ayongzü, aser iba tesentaktep ya arishi tepiyong alitsü, ta shia liasü.

DPRO staff tem tenüng nung Vihepu, IA, Niuland ajanga jembidang DPRO Dimapur menden nungi ainshila dak sempet tajung aliba bilemteta la nem tenüngsang agütsü aser la indang mapa tasenba nung takokba lidakjang ta moaja liasü.

Iba sentong ya I. Tiakumla Ao, IA, Dimapur lenisüba nung agi, kong Loretha-i sentong tenzüka sarasadem aser Asemo-i sentong tembang sarasadema liasü.

Dept. of Art & Culture ajanga Rural Libraries atema metetdaksür

Dimapur, Luroi/August 28 (TYO): Department of Art & Culture, Government of Nagaland kübok aliba Rural Library ajunga dang 'prescribed format' meshir pei Library indang osang tejangja pei District Cultural Officers nem November 30, 2024 tashinung agütsütsü Department ajanga sangdong ka nung metetdaksü.

Raja Rammohun Roy Library Foundation, Kolkata ajanga tuyuba ama Library tem metettsü atema ibai nungdaker. Library balalai services agütsüba aser inyaksangshiba temulung süa ali-mali repringba sülen mapang shia Library renew asütsü, ta sangdong ajanga ashi.

NGO Library ajunga Government of India indang NGO Darpan system (<https://ngodarpan.gov.in/>) nung register asütsüla aser NGO Darpan nungi unique ID generate sü, ta agütsütsüla, ta ashi.

Yamaji meinyakra Department of Art and Culture kübok NGO Libraries ama aliba registration pasasa agientsü, ta ashi.



GRPN/NSCN indang Crime Suppression Department (CSD) ajanga August 27, 2024 nü Old Showba nung gari yanglushidak Wagon R (White- VXi Model) Registration No. AS-01BB-0736 ngutet. Iba gari driver ya mali aser gari indang registration, chassis aser engine number tem balala, anungji auyaba südi ta CSD-i jangjatet. Parnoki gari ya soita lir aser gari kibur dang anogo 7 tsüngta documents tejangja bener arua agizüktsü metetdaksü. CSD, GPRN/NSCN den mobile number 7005653969 ajanga tongteprateptsü akok.

Gujarat state nung tzü metsüing lendong nung nisung 16 süogo



August 28, 2024 nü Vadodara nung tzü metsüing aliba noksa nung angur.

Ahmedabad, August 28 (Agencies): Tesüiba anogo ishika Gujarat nung tzüinglu maneni aruba ajanga kübok Vadodara densema district aika nung tzü metsüing lendong lir; nisung 16 bo süadokogo aser nisung 15,000 dak tema aienshidaktsüogo.

Tesüiba anogo pezü tashi Gujarat nung tzüinglu maneni aruba agi districit aika tzü agi metsüingbanga lir. National Disaster Response Force (NDRF), SDRF, Army, Indian Air Force aser Indian Coast Guard-i kümzükba maparen inyakdar.

Bodhbarnep Ato kilonser, Narendra Modi-i phone ajanga Gujarat Chief Minister Bhupendra Patel den jembia tzü metsüing tensa atema osang

metetpelaba sülen Centre sorkari akokba tashi state sorkar nungita yaritsü, ta metetdaktsüogo.

Gujarat nung taluka 251 nungi taluka 13 nungbo tzüinglu 200 mm aruogo. State nung tzü rizünga ayudak aser awatsüing 137 nung tzü tali mobangogo aser ayong 24 nung tzü lendongbang adena yimdar, ta ketdangsertemi metetdaktsü.

Mongolbarnü tzüinglu dak sendakba lendong balala nung nisung 9 asü aser Hombarnüa tzüinglu dak sendakba lendong nung nisung tenet asü.

Bodhbarnü Navsari, Vadodara aser Kheda densema district balala nungi nisung 8,460 aienshidaktsüogo aser ibaji densemabo nisung ajak senteper 16,000

aienshidaktsüogo.

Kü m z ü k b a maparen inyaktsü atema Morbi, Anand, Devbhumi Dwarka, Rajkot aser Vadodara nung army tem aika le m z ü k j a lir.

Vadodara nungbo Vishwamitri ayong nung tzü level feet 35 tashi atuogo aser kiyong kar nungbo tzü rang-a temai adoka senzüdar.

India Meteorological Department (IMD)-i Gujarat nung tzüinglu sashia arutsü ta asadangtetba sülen tesem aika nung "orange alert" sangdonga liasü.

IMD-isa August 28-29 anogotem nunga north Gujarat tasem aika nung tzüinglu arutsü aser South Gujarat nung August 31 tashi tzüinglu sashia arutsü akok, ta metetdaktsüogo.

BJP-i Rajya Sabha menden 9 nung takok ngua majority kümogo

New Delhi, Luroi/August 28 (Agencies): Rajya Sabha by election nung BJP-i menden 9 nung takok anguba aser parnok den teloktepia menden ana nung takok anguba ajanga 2014 küm sülen tang mezüing Rajya Sabha nung NDA majority kümgo.

BJP candidates aser NDA teloktep nungi candidates den tetokteper shinga makai parnoki takok angu. Joko menden 237 aliba Rajya Sabha nung BJP züingsem 96 kümogo. Tang Rajya Sabha nung menden 8 tazüing lir.

BJP den parnok teloktep nung densema aliba

züingsemtem den nominate asüba züingsem trok aser Independent züingsem anati parnok pusemba ajanga NDA züingsem ajak senteper majority züingya 119 jungogo. Joko House nung NDA-i tanga teyari magii ozüing ajak agizüktettsü.

Taoba kümsük nungbo Rajya Sabha nung ozüingtem agizükttsü atema Modi sorkari YSRCP (züingsem 11), BJD (8) mesüra AIADMK (4) dang nungi teyari meshitsüsa aküm.

Tangbo BJP-i YSRCP aser BJD teyari menüingdang anungji parnoki joko Congress-i aniba opposition ang yaritsüa

akok.

Tang Rajya Sabha nung menden tazüing 8 ji Jammu & Kashmir nungi pezü lir aser tanüingba menden pezü atema züingsemtemji linük Tiri shimtsü, anungji tarutsü nung ano NDA züingsem teimba bendenlokttsüa akok.

Tawa Rajya Sabha by election nungji menden ka nungbo Congress lenir, Abhishek Manu Singhvi-i takok angu. Tang Rajya Sabha nung Congress züingsem 27 kümogo ajisüaaka opposition lenir menden atema ano parnoki menden ana nüingdaker.

Tashiyim amshia raksatsürtem nem tasüba temerenshi agütsütsü: Mamata

Kolkata, August 28 (Agencies): Tashiyim amshia taküm raksatsürtem nem tasüba temerenshi agütsütsü atema ozüing ka agizükttsü asoshi West Bengal Chief Minister, Mamata Banerjee-i temeja assembly senden ka ayongzükcogo.

Bodhbarnü Trinamool Chhatra Parishad sentong nung jembidang Trinamool Congress tongti, Mamata Banerjee-i, iba ozüingji anogo 10 tsüingda agizükttsü aser kasaji agizükttsü atema state Angh nem agütsütsü, ta metetdaktsü.

Mamata-i, "Angh-i ibaji magizükra ozü party-i Raj Bhavan kima longkak aittsü," ta metetdaktsü. Tawa Kolkata nung aliba RG Kar Hospital nung arrshi küm 31 tetsür doctor ka tashiyim amshia raksatsür tepsetba tatalokba anema Kolkata nung nüburtem kanga jashia aliba mapang ka nung Chief Minister-i tashiyim amshia ataküm raksatsürtem nem tasüba temerenshi agütsütsü atema ozüing agizükttsü sangdonger.

"Angh-i iba Bill ji

magizükttsü, ta ni meteta lir. Iba Bill agizükttsü atema tetsürtemi yangji mener ghonda aika longkak aittsü," ta laisa metetdaktsü.

Kolkata nung aliba hospital ka nung iba tatalokba nung ajemdaker BJP-i yimtenren aiddaktsür, ta shia Mamata Banerjee-i BJP aittsü.

Laisa Centre nung BJP-i aniba sorkar aija, "Doctor ka tashiyim amshia raksatsür tepsetba ken o ya Central Bureau of Investigation-i Kolkata police ket nungi agizükba sülen anogo 16 jungogo. Ochi temeden kong ali?," ta asüingdang.

Tang ozüing tasenba Bharatiya Nyaya Sanhita (BNS) kübok tashiyim amshia raksatsürtem tajemba agia küm 10 tepsuokdak ayutsü aser akümüli piyong-a tepuokdak ayutsü akok (Arrla 64) aser Arrla 70 kübok teloki tashiyim amshia raksatsüra tajemba agi küm 20 tepuokdak ayutsü, taküm piyong ayutsüa akok aser ken o kar nungbo tasüba temerenshi-a agütsütsü akok.



August 28, 2024 nü New Delhi nung External Affairs Minister, S Jaishankar-i Chile Foreign Minister, Alberto Van Klaveren ajurudang tangokba noksa nung angur.

UP kübok Bahraich district nung tsünü telok kati nisung 9 ngusetogo

Bahraich, August 28 (Agencies): Uttar Pradesh state kübok Bahraich yim dak tang tashi nung tsünü telok kati agi tanurtem teimba ser nisung 9 ngusetogo.

UP nung Bahraich district kübok yimtsüing 20 dak tema nungbo aonung tetsür-tanurtem amoi oa alidang teburtembo insang aser ajok amer ayimdena sangwadaktsür.

Tesüiba anogo 40 dak tema Terai region nung yim 30 shi nung teburtem amoi junga moi tsünü anüker aser anüingdang-a tanurtem kimai ayazüka meyoker, ibayongji tanurtem school-i mapang talangka maocer.

Tsünü agi tang tashi nung ngusetba tanurtemji arrshi küm 1 nungi küm 8 tsüingdapurtem lir. Nisung 9 nungjagi nisung 7 bo July 17 nungi August 26 tsüingda ngusetba lir. Iba dak

alia tsünü telok jagi nisung 50 dak tema yirutsüogo.

Mongolbarnü District Forest Officer (DFO), Ajit Singh-i, CCTV noksa nung tsünü trok anguba sülen tsünü asembo puogo saka tanüingba asemji tang tashi nemzüdar; asem nungjagi kabo tetsüing tera tatsük, ta metetdaktsü.

Amongnü aonung tsünü agi ngusetba, Rita Devi tekong nung tarak 21 liasü saka tsünü jagi tasü mangjibo machi, ta district SP-i metetdaktsü.

Ano tanga tatalokba ka nungbo tsünü jagi arrshi küm 8, Khushboo indang teka aser tetsüingbo chiadoker liasü.

SP-isa, Khairighat aser Hardi PS area nung teams aika lemsar aonung patrolling senzüdaktsüdar, aser tanüingba tsünü asemji mapu tashi patrolling senzütsü, ta metetdaktsü.



August 28, 2024 nü Panaji nung Goa Chief Minister, Pramod Sawant-i Citizenship (Amendment) Act, 2024 kübok Joseph Pereira nem linük senso certificate agütsü dang tangokba noksa nung angur.

Technology ajanga reshikangshi ajangshiba Khristantem yaritettsü



Online ajanga Bible courses agütsüba Gospel Coalition organization indang sentong ka nung tangokba noksa nung angur.

August 28, 2024: Technology ya sen amai dang lir, anungji mapa tajung aser tamajung naprongla atema technology amshitetsü.

Alima nung technology ainba ajanga reshikangshi kanga bulua kümogo, ajisüaka technology ajangasa reshikangshi ajangshiba Khristantem-a lenmang aisü nung yariteter, talisa Whatsapp ama shingai message mezüngtetsüsa nisungtem tsüngda tongteprateptetba ajanga reshikangshi ajangshiba nbüburtemi pei kibong züngsemtem mesüra international organizations den tongtepratepa teyari agiteter.

Tatishitsü agi, Muslim nung nüsüng teimba aliba Iran linük nung Khristantemi 'Signal' amshia sabang balala nung taküm kuli lemsatepteter; yamaji China nunga WhatsApp ajanga tangar nem memettdaktsüi Khristantem tsüngda amalitepteter.

Social media aser online platforms ajanga alima tesem balala nung reshikangshi ajangshiba Khristantem indang timtem balala meteter, aser Khristan melungtet teloktemi

yariteter.

#SaveTheChristianMinorities ya social media campaign ka lir, koba ajanga hashtags amshia Khristantem reshikangshi indang awareness agütsütetba ajanga alima linüktemi item ama Khristantem yariteter.

International Christian Concern ama Khristan melungtet teloktemi parnok indang websites aser social media channels amshia reshikangshi ajangshiba Khristantem indang otsü lemsateptetba den külemi parnok kümzüksü atema inyaker.

Ano külen online tekülem sentongtem aser online Bible education ajanga tamangertem tanela nung ainer.

Boko Haram teloki kanga timtem agütsüba Nigeria linük nunga Khristantemi Zoom mesüra YouTube ajanga tekülem sentongtem nung dena tanela chiyungtsü angur.

Bible.org aser The Gospel Coalition organization ajanga online Bible courses agütsür aser Saudi Arabia ama Khristan yimsü khenyongi memelaba linüktem nung Khristantemi online ajanga tanela chiyungtsü

peria angur.

Technology ajangasa meimchir temeden atema inyakba organization balalai alima tesem balala nung Khristantem reshikangshi jenjang meteta akokba lenmang ajanga yarir.

Human Rights Watch-ia satellite imagery densema digital tools amshia Myanmar ama linüktem nung Khristantem reshikangshi jenjang asadanger.

iWitness mesüra International Criminal Court's online ajanga Eritrea ama linüktem nung Khristantem kanga reshikangshiba mesüra tepuokdak ayuba osangtem sangdonger.

Technology ajangasa online ajanga tenla bendena reshikangshiba Khristantem yarir mesüra Khristantem yariba organizations yarir.

Ano Pakistan ama linüktem nung Khristantem yaritsü atema GoFundMe platform ajanga fundraising campaigns agia Khristantem yarir.

Khristantem kanga reshikangshiba region balala nung Khristantem yaritsü atema digital tools ajanga shisaliok aser training agütsür.

Covid wara mapang nung Orthodox Arogotem kanga renlok

August 28, 2024: Coronavirus wara mapang nung America nung Arogo aikati Tenla kitem shibanga liasü aser online ajanga dang tekülem sentong agia aruogo.

Ajisüaka US nung Orthodox Khristantembo shilem 50 dak temai lokti sentongtem nung shilem agi aser Tenla kidang adenshia tekülem sentong nung dena aru.

Wara mapang nung Orthodox Arogotem aikati Tenla kidang adenshia tekülem sentong nung adentsü memelungi liasü aser wara mapang nung Orthodox Arogo tasen aika renlokogo.

Wara mapang 2021 küm online ajanga dang tekülem sentong agiba agi Tenla kidang züngsemtem kanga ajema aküm saka yaküm March-April ita tashi nungbo Orthodox Arogotem nung Tenla kidang züngsem tali renlokogo.

Wara mapang 2020 küm Orthodox Arogotem nung volunteer shilem 40 ajema aküm saka 2023 küm nungbo volunteer shilem 25 dang ajema liasü.

Hartford Institute for Religion Research aser U.S. Census of Orthodox Christian Churches national coordinator, Alexei Krindatch-i sangdong

ka ajanga, coronavirus wara mapang nung Orthodox Arogotem nung züngsemtem kanga renloka liasü, ta metettdaktsü.

2020 küm nungi 2023 küm tashi asadanga study ajanga bushitetba agi, wara mapang nung US nung Orthodox Arogotem shilem 44-i Tenla kitem lapoka liasü saka tanga Arogotembo shilem 12-i dang Tenla kitem lapoka liasü.

Orthodox putirtem shilem 31-i dang Arogo züngsemtem dang vaccine agitsü ajungshia liasü saka tanga Arogotem nungbo putirtem shilem 62-i pei Arogo züngsemtem dang vaccine agitsü ajungshia liasü.

ANOGO ABEN TSÜNGREM DEN

Tenüngsang

"...Khrista miim o nung ni angazükba nenoki angatetsü. Iba miim oji tang Tanela nung..nisung chirtem dang memettdaktsü liasü" (Ef. 3:4,5).

Tasen Lai nung tamangertem Tanela Temeshi ajanga Khrista den sendaktepba miim aika jungkai adok. Arogo nung bendanger tamangertem den Yihuda nung tamangertem den arok senmanger aküm. Iba jungkai adokba tongtibangji Tsüngremi Abraham dang nangzükba temoatsütem dangi meyipa kin ajak moatsü. Abraham, Isak, Yakob pamoki iba tenangzükba nung amang.

Saka Israeli anema apuso aser Tsüngrem nungi pila. Pai pamok alima ajak nung prokshidaktsü aser magizük, anungji bendangertem dangi ao. Bendanger kintemji Yihuda nung asoshi tesembatsü liasü, anungji parnok nem agütsüba taochi aser yimlibilem atemaji Abraham nungi jakzükertemi mebilem. Aji saka tamangertem ajak nem Abraham temoatsütem agütsütsü Tsüngrem sentong liasü. Miim mapaji ya, Tanela Temeshi ajanga Paul dangi jungkai madoktsü tashi Tsüngremi iba tenangzükba miima dang ayu. Yihuda nungeri mebilemba bendangertemi agizük. Tsüngrem sentongji kin ajak, oshi ajak temang ka nung temoatsü lemsateptsü asoshi liasü.

Oba, Bendanger temenen nisung ka, Abraham dang nangzükba temoatsü nung shilem agir kümdaktsüba asoshi ne tenüng asanger.

India nung Khristantem amakba mesüra apuba kanga bulua kümogo: RI



August 28, 2024: India linük teloktepi takok anguba ajanga nung Khristantem anema Hindu yimsü alia amangertem inyakba kanga bulua kümogo, ta taliba tasü itdaktsüogo.

Evangelical Fellowship of India (EFI) indang Religious Liberty Commission report ajanga ashiba agi, 2023 küm India nung Khristantem anema inyakba tatalokba ken o 601 liasü aser ibaji shilem 45 agi teimba akümba lir.

United Christian Forum (UCF)-ia taküm küm tenzüker June ita tashi nung India nung Khristantem anema inyakba tatalokba 361 lir, ta metettdaktsü.

Release International CEO, Paul Robinson-i, "Tesüiba küm ter tsüngda India nung Khristantem anema inyakba kanga bulua akümba onoki nguogo, aser tanga yimsü amangertem magizüktetba kanga bulua akümer," ta metettdaktsü.



TIR YIMYIM YIMOBILEM (EDITORIAL)

DIMAPUR YANGTEPNÜ, AUGUST (LUROI) 29, 2024

Government mapa shiteta yutsüba

Tang temendak Nagaland tatar senden nung tatartemi Nagaland ajungtsü atema nungdak ken o aika süoka jembiba rongnung kanga süoki ia bilema rongdak nungdaksa inyaksüba ken o kaji MLA Wb. Achumbemo Kiconi Naga nunger lanurtem rongnung government mapa bushirtem asoshi kin apir shilem kar shiteta yutsüba inyakyim indang reprangshitsü nungdakba ken o süokba ya asütsü. Atangji, Nagaland nung dang masü saka alima ajaklen nisung teimbakati government mapa dang inyaker, kechiyong government mapajisa anitesungzükba aser talila teyari aika angur, ibaji dang masü peisasa mapa bushiteta inyaksüba ya aikati meinyakteter, ajisüaka government mapaji tezüngtet ka dang, anungji nisung ishika nem dang government mapa agütsüteter, iba jagi tazüngertema tazüngba yari aser mazüngertema mazüngba yari pei pei dak alang government mapa rakteptsüsa akümer. Iba ama tensa tia ka nung, government mapa tadokba ajak nung tamalen zünga shia meteter aser tangar dang nungi talila kaa itta alir kibongtem nungi adokba lanurtem dang shimtsüsa mesüi tashitemetet nunga aser rongsen nunga tangar tamalen pur kin aser lokti memenep ser teküpbok tia nung alirtema government mapa ngutettsüsa parnok nem shilem balaka lemsüka toktsür. India nung pi memenep item teküpbok tia nung alir kintem rongnung Naga nungertema kin ka lir. Iba jagi Naga nunger ya India nung Scheduled Tribe purtem rongnung züngoker. Iba jagi dang ashi, India nung Naga nunger ama yashiang shisa tenük lapokertemi akhi tejen putu küm meyirijang tema tejaklen nungi shia meteta aruba tashitemetet kintem den government mapa merakteptettsü. Ibaji tera mesüka, Nagaland nunga zünga shia metetba tsütsü mezümpur aser tesüpur ta Naga kintem rongnung lemsaa lir. Atangji, Naga nungertem rongnung tejakleni aoba kin aser tesülen atsüngzüka aliba kin ta telok ana küma lemdangba maparen nung pei zünga shia metetba, rongsen akaba makaba aser pei telidakba tesem indang kecha mezüngshir saka kin agidang bendanger. Aji oda, Nagaland nung alir Naga kintemsa süaka Ao, Angami, Lotha aser Sema ama kintem ya tejakleni aoba kintem ta züngshir, anungji parnok atema government mapa adokba nungi shilem balaka shiteta meyutsür, ajisüaka tanünga kintem asoshi government mapa adok shia noklang nung shilem 37 shiteta toktsür. Ano, item teküpbok jenjang nung aliba kintem asoshi 37 % shiteta yutsüba nungjia parnok rongnunga kin ka khen, kin ka khen ta melentepa agitsüsa parnoki aginüba ama government-i sentong ka yangluja lir. Aji oda, tang Nagaland nung government mapa adokba shia shilem balaka shiteta yutsüba inyakyim ya kodang reprangdangdir, shitakba teyari angutsüla purtem masü saka kin tenüng agi teküpbok jenjang nung alir kümtsü dang ashi, zünga shia metetba nungbo tangar tejaklen pur ta züngshiba kintem den kasasa zünga shia metetba purtemang iba maongka ya angur. Ibaji dang masü saka item Naga kintem rongnungjia kin tulu tila ta lir, anungji kodang government mapa shiteta yutsübaji nütsüng yongsük apia masü saka kin apia lemdir, tatishitsü agi, nütsüng yongsük lakh ana dak tema aliba Konyak nungertem o nütsüng yongsük lakh ka majung aliba kintem na kasasa maongka agir akümer. Ibaji shitak masü. Ano, kin dang apia government mapa adokba shia shilem balaka shiteta yutsüba yagi Tuensang district nung alir kintem dang nungibo zünga shia metetba tsütsüa Mokochung, Wokha, Zunheboto aser Kohima district nung alirtemang teküpbokba jenjang nung liaka, itemji tejakleni aoba kintem nung züngoka aliba agi government mapa balaka shiteta yutsüba shilem aser maongkaji magitetter. Iba amaji kin apir masü saka kibong aser lokti shia pei temetetba aser akaba jenjang asadanger, government mapatem adok shia shiteta yutsüba shilemji agidaktsütsüsa tanü tensa dak apit iba ozüng ya reprangshia yanglushitsü mapang tongogo. Idangjibo, tang teküpbok jenjang nung züngshia aliba kintem nungi takar aser tular chirnurtem masü saka shitakba Naga nunger sensaker aser teküpbok jenjang nung alir chirnurtemang government mapa balaka shiteta yutsüba shilemji agitettsü.

OLEMSABANG

LANUR MAPA MANGUBA TEBILEM TSÜ YA MAPA MEINYAKNUBA AGI ADOKBA LIR

~ L.Kika Pongener.

(Yashi adok nungi...)

Asenok ya tangar dang talir (Buyer) dang masü, saka tayoker (Seller) asütsü merangtsüla. Asen lima nung tzümartem aika Wholesaler/Agent mapa inyakerkem, sorkar mapa nung Gazzeted Officer ka itasen dang nungi kanga agi teimba ita nung tajangzük angur. Ano parnok dang nungi Retail Price nung alizüker Dokan shishirtema aika anogo nung tajangzük sen noklang/merijang aika ngua shishir. Asen Naga nungeri Grocery/Hardware/Garments/Goods etc. Shop ya shishi nunga lanur aika mapa inyaksü maongka angutsü. Asenok tenuk melapoki mapang talangka amoua oa aliba mapang shishilempaba mapatong ajunga tzümar nem ajepbangdaksüogo. Ajisuaka, inyakdi sura ano kecha temenu mali. Aji oda, tang asenoki tashiyim amshia mapa ajungaji rakzüka aonung, asenok tsüngda nung rongrong/rara adoktsü. Ajisuaka, tanem-tanemi tim lenmang kar bushia item shishilempaba mapatong tongtoret-tem ya asen Naga nunger keti bener arutsü merangtsüla. Iba mapa nung ya, temalen shisemba ama NSF-i anir Students Unions aser Lanur Telongjem-i bendanga agüja inyaksüla. Iba mapa nung ya sorkar-i anir mulongtet telok (NGO) -tem ajaki nungita yariteptsüla. Aji oda, mapang kanga memenudang sorkar-i anir teinyaksü kar meinyakra kanga menuadoker asütsü.

Ano asen lima nung sungjanglijang Teti, Bolong, Naring, Motiram, Naspati, Somomo, Antsü-lashi, etc. aika mapang tatsüka tsüngda nung menzüker (Over-ripe) shizüka endokmar. Anungji itemji shizüka meintoki-i chiyungtsü tajung (juice/wine) küma yanglur bendangleni yoktsü lenmang yanglutsüla. Lanur kari asen lima nung atangba sungjang lijang ajungaji Wholesale agi alizüktsüla aser bendangleni yoktsü lenmang bushitsüla. Yamaji inyaktetra, asen lima nung sungjanglijang-lu ayimer kiburtema ajangzüktsü aser Wholesaler-temjia ajangzüktsü. Ano lanur kari Dimapur jila ama nung Factory lapoka, item sungjanglijang jagi chiyungtsü tajung (juice/wine) küma yanglur bendangleni yoktsü lenmang bushitsüla. Ano 'Zü' (Bamboo shoot) agi chiyungtsü yanglur mongpo masüba mapang (Un-Season) nunga chitettsüsa yanglur bendangleni yoktsü lenmang bushitsüla. Tanü putu nung 'Naro' ya kanga senti-sa metsüteper. Anungji lanurtemi 'Floriculture' nung temulong agütsütsüla. Asen lima arem min nung aliba 'Akong Naro' (Orkits) ya bendangeri kanga sapor ta angazük. Anungji Akong Naro-lu yima bendang limai yoktsü lenmang bushitsüla.

Aji oda, item mapaji inyaksü atema lanur ajak ket nungbo senotsü peria malitsü akok. Anungji sorkar-i Bank loan tetemlok (Interest) teküpoktiba nung agüja yaritsüla. Ano sorkar den semloka, takar arogotemi lanur zünger mapa mangur nem küm shia Mission mapa ka amai lanur kar pei sasa mapa tenzüka inyaknur sernung senotsü maka tsükdaker lira, item lanur nemji loan agüja yari nungbo kanga ajungtsü. Kechiyong lanur zünger mapa manguba tebilem tsü ya sorkar atema dang masü, saka loktiliba ajak atema khuret tulu lir. Tanü lanurtemji raksara, tarutsü aliba putuji teraksa putu ka asütsü aser asen lima nung lanur kiralongrar aser rakzükraakterem aika adoktsü. Anungji iba mapa nung ya takar arogo kari danga Mission mapa ka ama küm shia arogo Budget nung inoker lanur kar danga yaritsü ajungshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

**AO OSHI ANGAZÜKDAK:
TANÜ ANGAZÜKTSÜBA OJANG**



Tamasa

(adj) mezüngsa, tajakdang (first of all)

* Mapa ajak nung tamasa asütsü merangtsüla.

Tamasayu

(v) mesayu, sayubentsü o mashi (not disciplined, not taught)

* Tamasayu chiri lokti nem timtem agütsür.

OLONG PAITEP # 6908

1		2		3		4	5			
				6						7
		8								
9				10		11				
			12						13	
						14				
16									17	

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S___i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6907 TELANGZÜBA

TIPIEN :

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.

NAI-A YA METETTER MA



Cristiano Ronaldo-i ghonda 24 nung YouTube subscribers anguba atema Guinness World Records title ka nguogo. Guinness World Records-i Ronaldo indang YouTube nung 19,729,827 subscribers lir ta taoba hopta metetdakja World record title agütsü aser channel lapoker anogo 6 tsüngda 50 million subscribers kümogo. Portugal nung arishi küm 39 tain Cristiano Ronaldo ya tang Saudi Arabia nung Al-Nassr club atema asayar.

Assam opposition-i chief minister Sarma anema FIR ka benok

Guwahati, August 28, 2024 (Agencies): Assam Chief Minister Himanta Biswa Sarma-i Assam nung tamangba yimsü aser kin balala tsüngda tsükchitep adokdaksütsü ajungmesor ta Assam Pradesh Congress Committee den opposition party temi tai tongloksüogo.

Bodbarnü parnoki Dispur Police Station nung iba atema FIR ka benokogo.

"Chief Minister Sarma-i tawa jembishinüba aser inyaksangshiba ajanga kin o kin tsüngda mepetmesü adoktsüsa kümogo" ta Assam Congress, Assam Jatiya Parishad, CPI(M), Rajior Dal, CPI, Nationalist

Congress Party (NCP), Rashtriya Janata Dal (RJD), Janata Dal (United), Trinamool Congress aser CPI(ML) adenba opposition alliance ajanga ashi.

"Sarma-i tamangba yimsütem aser talisa Muslim anema o jembia arur. August 23, 2024 nü Sarma-i osangbener senden ka nung tesem kar nungi nisungtem aienshitsu tebilemba nung kin ka anema kuli maliba onüktem jemi" ta FIR nung shia lir.

"Iba ama olen ajanga state nung ozüng alema inyaksangshir aser Sivasagar nung BJP züngsemtemi tamangba yimsü tsütsü nübo agi tangar memenepertem amak. CM Sarma-i tanga BJP lennirtem den

tasa atonga Assam nung tensa mejungi akümsü mapa inyaker" ta Assam opposition party temisa ashi.

Police-i Bharatiya Nyaya Sanhita, 2023 nung arrla balala kübok ken o benoktsü aser state nung mepetmesü tali adoka maotsü atema Chief Minister aser pa den yaritepertem anema mapa inyaksüla ta FIR nungsa shia lir.

Dhing nung tawa tebur aseme tanur tetsür ka dak tashiyim agi shi nung medemba sülen nisungtem jashiteper aser lungkak aita aruba mapang ka nung Assam CM anema FIR benokogo.

Meghalaya sorkari Harijan Committee mepishiba angadangtsü

Shillong, August 28, 2024 (Agencies): Harijan Panchayat Committee (HPC)-i Them Iew Mawlong area nungi kibong 342 tangaleni belentsü atema mapang talila meshisemba Meghalaya sorkari angadangtsü.

Iba tesem dang Harijan Colony ta ajar aser HPC-i mepishiba angadangtsü atema senden ka amentsü.

"Lemtet kecha magidang tamasa telung nung angatetteptsüla. Onoki tan hopta tsüngda ajurutepa senden ka amentsü aser lemtet ka agitsü" ta Meghalaya deputy chief minister, Prestone Tynsong-i ashi.

Meghalaya sorkari tesüiba nung HPC nem anogo 15 tsüngda relocation blueprint atema lemtet

ka agitsü mapang züngzükja liasü.

"Onoki joko mapang talila magütsütsü lemtet saka parnoki ano senden ka amentsü asüngdangterji onoki tamasa department sasep nung jembir ang lemtet agitsü" ta Tynsong-i ashi.

Parnoki lennir tejentem aser Sikh nung laktitet balala den asüngdangteptsü atema mapang nüngdaker. Sri Akal Takht Sahib nung Jathedar, Amritsar nung Shiromani Gurdwara Prabandhak Committee aser Delhi Sikh Gurdwara Management Committee nung den asüngdangteptsüsa akümer ta HPC Secretary Gurjit Singh-i ashi.

"Onoki parnok den asüngdangteptsüla saka parnok jeli sentongtemaliba ajanga taruba hopta ana mesüra asem tashi parnok mazüngtsü" ta pai ashi.

"Sorkari agütsüba relocation blueprint HPC-i magizükra iba ken o okadak ang tembangtsü aser iba ajanga facilities agütsütsü ashiba mapang agitsü" ta Meghalaya Deputy Chief Minister & Urban Affairs in-charge Sniawbhalang Dhar-i taoba mapang shiogo.

Meghalaya sorkari August 31, 2022 nü Shillong Municipal Board (SMB) indang ali acre 2.5 nung Harijan Colony nungi aoertem lidaktsütsü atema ki yanglutsütsü lemtetba osang metetdakja liasü.

Assam nung Muslim nung atema 10% reservation meshir

Guwahati, August 28, 2024 (Agencies): All India United Democratic Front (AIUDF)-i Assam nung Muslim nung asoshi 10% reservation meshir.

"Assam nung Muslim nung rongsenketzüng tsütsü tangar menenep aser government jobs aser schemes ajanga teyari nüngdaker. Assam nung Muslim nung ajungkettsü atema 10% reservation onoki meshir" ta AIUDF MLA Aminul Islam-i ashi.

"Assam Chief Minister

Himanta Biswa Sarma-i population statistics metetdaksüba ashishir. Sarma-i ashiba figures aser 2011 Census meputeper. 2011 Census nung Assam nung Muslim nung nütsüng yongsük 34% lir ta ashir aser iba sülen 2-3% shi talila kümer alitsü akok. Chief Minister-i ashiba ya data shitakba den khenyongi meputep" ta pai ashi.

"State sorkari tawa tetsür dak tashiyim agi shi nung medemba ken o tem tim mesüi inyaker.

Parnoki osang kar dang shimteta prokshir aser Muslim nung adenba ken o tembo ka danga metoktsür" ta Aminul Islam-isa ashi.

"Dhing nung tebur teloki tetsür ka dak tashiyim agi shi nung medemba nung tai tongloksür ka police ket nung lia asü aser iba ya sorkari langka miimbangtsü atema inyaka ama bilemer. Anungji onoki temeten meshir aser ken o ajak jungjunga bushisüngdangtsü akhanger" ta paisa ashi.

Syria nungi aruba Mizo tsür aseme CM Lalduhoma dang pelar

Aizawl, August 27, 2024 (Agencies): Syria nung ita 20 tema anendaka lir aruba Mizo tsür aseme Chief Minister Lalduhoma den ajurutepa pa dang pelaba metetdaksüogo.

Chief Minister-i parnok Mizoram-i aruba atema pelashishia agizük aser bendang linüktem nung Mizo nung timtem ajurudang yaritepba Mizo Diaspora Cell indang lemsatep.

2022 küm Mizo tsür asem ya private placement agency kati Syria nung kidang lia yariteptsü atema yokba liasü. Ajisüaka parnok working visas tim maliba ajanga Syria kettangsurtemi timtem agütsü.

Mizoram BJP Spokesperson Lalremsangi Fanai-i par asem indang khuret metetdaksü aser paia parnok meyipa arutsü atema



ozüng dak sendakba maparen nung yaritep.

Chief Minister Lalduhoma aser Home Minister K Sapdanga na dena taküm May ita nungi par asem anir arutsü asoshi mapa

tenzüka liasü.

August 24, 2024 nü par asem Aizawl tonga aru aser iba sülen Champhai aser Hnahthial district tem nung pei pei yimtsüngi aotsü.

Israel mitkari West Bank nung operation tesashi tenzük

Jerusalem, Luroi/August 28 (Agencies): Israel sepaitemi occupied West Bank north tsütsü Palestine nung nisung toku tepsetogo, ta Palestine health ketdangsur temi ashir.

Ajisüaka asürtem ya timba alitsü, kechiaser Israel-i ayatirm nung operation tenzükba sülen nisung 11 tepsetogo, ta Palestine ketdangsur temi shia liasü.

Israel security forces ajanga ashiba agi, parnoki Jenin aser Tulkarm nung kiralongrar aridoktsü mechi counterterrorism operation ka agir.

Ibai Israel nung operation tesashi ka amai ajiteter, kechiaser kasa mapang Palestine nung yimti pezü – Jenin, Tulkarm, Nablus aser Tubas nung tenük yok.

Iba yimya nung mapang kasa

nung Palestine nung yimti balala amakba ya tan agi tanabuba, kechiaser ‘second intifada’ (2000 nungi 2005 tashi Palestine nung nokdakba) mapanga yamai inyaka liasü.

Palestine nung osangtem ajanga ashiba agi, Jenin telungi aiba lenmang tulutem shibangogo aser iba yimti nung aliba refugee camp nung khateper.

Anepbongi anasa yimtsüng ka nung gari ka dak tenük yoker Israel sepaitemi tayimtsü amshia amak ta ashir.

Israel sepaitem ya Jenin nung mozüki ka telungi yiogo aser Tulkarm nunga mozüki ana lungbanga lir ta ashir.

Israel mitkar temi Nablus nung refugee camp ana dak rangloker tesem balala meita ao. Tubas anasa Far’a camp

nung Israeli drone agi amakba ajanga ambulance tem yirur alidaki moteti timtemtar ta medics ajanga ashi.

“Jenin aser Tulkarm refugee camps nung Iranian-Islamic kiralongrar temi ki o jen yanglua aliba raksatsütsü asoshi yasüng nungi tashi ajak amshia yangji operation agir,” ta Foreign Minister Israel Katz-i ashi.

West Bank nung Israel anema front tasen lapoktsü merangba atema pai Hamas aser Palestinian Islamic Jihad yariba Iran linük dak tai tongloktsü.

“Gaza nung kiralongrar indang ki o jen raksatsüba ama onoki kasa mera agia Palestine nungertem khen atema ainshidaktsütsü aser nungdakba mera ajak agitsü,” ta pai ashi.

(Maneni tapak 8 nung...)

MULUNGNEN O



15th June 1952

26th August 2024

Asür **Ms. Merenkala Sanglir** (Molungkimong) la asüba mapang lokti balala, kija, kibong shirnoki onok den nübo, rongsen aser sarasadem nung yaritepogo, nenok ajak dang temulung nena pelaba lemsateper. Tulusang Tsüngremi nenok ajak tali moajang ta onoki sarasademtsür.

Temeim Kinungertem.

OFFICE OF THE LONGSA YIMLANG ONGER SALANG MOKOKCHUNG: NAGALAND MEYIPTSÜR

Tir Yimyim adok 313 anogo 26th August 2024 page 7 nung “SANGDONGER” ta sür koba Longsa Onger Salangi adoktsüogo, ibaji Longsa Yimlang Onger Salang ajanga yamai meyiptsür.

Longsa Yimtsüng nung koba ken O ka küm pezüshi tejaklen adoker telok ana kümer tanü tashi ano junga metembangteti arudar, iba timtem reprangtsü asoshi Deputy Commissioner Mokokchung dangi Longsa Yimlang tenüng nung shity ka zülü aser DC-i timtem angateta iba ken O reprangtsü District Dobashi Court nem agütsü. Iba Ken-O Dobashi-temi Longsa Yimlang Vrs Longsa Village Council ta sür telok anaprongla O angadanga tatsü talang ajak apidanger Judgement agütsüba nung Longsa Yimlang tenüng amshiba asoshi tashishitepba Ken O (Complaint) kecha melie Court-i lemtetsüba nung telok anapronglai hau ta agizük.

Tanabuba nung, Koba Mr. Aoshilu aser Mr. Tongpangkobba tena tenüng ajanga Longsa Yimlang Lenla Senso Mungdang telemtetba Tir yimyim nung 20th August, 2024 nung sangdongogo, aji tena jurila lemtetba masü, saka Longsa Yimlang Senso nübur telemtetba Sangdong. Anungji tena jurila Longsa Onger Salang-i 31st August, 2024 anogo nü jaokba nung oer atentsü memelar ta Longsa Yimlang Onger Salang ajanga metetdaksür.

1. Wb. Temjenlemba Tatar, Longdi
2. Wb. Imotiba Tatar, Longdi
3. Wb. Imsutoshi Tatar, Longzung
4. Wb. Toshimanen Tatar, Longzung
5. Wb. Tiatemsu Tatar, Songmang
6. Wb. Ngangshitemjen Tatar, Songmang

Rara tembangtsü atema Zelensky-i Biden den sentong lemsateptsü

Kyiv, Luroi/August 28 (Agencies): Mongulbarnü Ukraine Tir Volodymyr Zelensky-i ashiba agi, Russia den rara ya jembishinü ajanga tembangtsü saka Kyiv jenjang tajung nung alitsüla aser iba sentong ya US Tir Joe Biden aser pa melentsü teimla aliba nisung ana den lemsateptsü.

Ukraine lenir ya osangbener senden ka nung jembidang, Kyiv-i hopta asem Russia indang Kursk region telungi ia amakba ya iba sentong nung shilem ka lir saka yanghi ano rongsenketzung aser diplomatic tsütsüa mera kar lir, ta ashi.

“Iba sentong indang onük tongtibangbaji Russia nem rara tembangdaksütsü asoshi lir. Aser ni ibaji kanga aginer aser

ibaji Ukraine atema tim asütsü,” ta pai Kyiv nung osangbener dang ashi.

Russia-i tashi ajak amshia February 2022 nungi Ukraine maka arur.

Par taruba mera atema iba dak alaka rasaa mashi saka pai iba sentong ya Democratic Vice President Kamala Harris aser Republican Donald Trump den jembitsü ta ashi.

Ni September ita New York nung UN General Assembly nung adentsü atema United States-i aotsü imlar aser Biden ajurutsü renema lir, ta Zelensky-i ashi.

Kyiv indang yimjung mangdang tejakleni bener aotsü asoshi mezüngbuba senden ya June ita Switzerland nung mena

liasü, kong Russia maden aser delegations aika liaka China nungi meliasü, koba alima nung economy tsütsü tulutiba jenjang tanabuba nung lir.

Ukraine-i August 6 nü Russia indang arütsü alema oa Kursk region amakba sülen Russian Foreign Minister Sergei Lavrov-i jembishinütsü nungdak mali, ta August 19 nü shia liasü.

India Ato Kilonser Narendra Modi shiba taoba hopta Kyiv nung liasü, pai Mongulbarnü phone ajanga Russia Tir Vladimir Putin den jemi aser pai Ukraine rara atema tekeraba nung yimjung pangzüng ka renemtsü bhusemer ta shia liasü.

(Maneni tapak 8 nung...)

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA Dt. Kohima, the 28th Aug., '2024 NOTIFICATION

NO.DTE/ESTT-2/NEET/01/2024-25/ This is to notify the NEET (UG)-2024 appeared candidates who have submitted forms for undergoing MBBS/BDS & Allied Courses for the current academic session 2024-25, that 1(one) seat in BUMS (Bachelor of Unani Medicine & Surgery) in Nizamia Tibbi College, Charminar, Telangana is vacant. Interested candidates are informed to submit application to the Office of Directorate of Technical Education, Kohima, Nagaland on or before 30th August, 2024, 2:00 P.M (latest).

Note: Candidates are informed that the Urdu language is a compulsory subject in the first year.

(ER. VIPULHOU LHOUNGU) Director

GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA. NO. DHFW-3/117/KPE/Crt/2023/4430-33 Dated Kohima, the 28th Aug' 2024 NOTIFICATION

In pursuance to advertisement No. DHFW-3/117/KPE/Crt/2023/4838-4844 dated Kohima the 14th Dec'2023 and on approval of State Government vide letter No. HFW(A) Appt-8/66/2018/395 dated Kma16thAug' 2024 the undersigned hereby declare the candidate who is selected to the post of Medical Attendant at Longya Sub-Centre under the establishment of the Chief Medical Officer, Kiphire.

Sl.No	Name	Fathers Name	Name of the retired official/ expired official & Health Unit
1.	Shri. Khumrose	Tsathrio	TsaliseSangtam Rtd. W.e.f 31.03.2018 (MED03429)

This is in compliance of the Gauhati High Court, Kohima Bench Judgment Order dated 20.01.2023 passed in No. W.P (C) No. 4 172/2019.

Sd/- (DR. E. MOTSUTHUNG PATTON) Principal Director Directorate of Health & Family Welfare Nagaland : Kohima.

Bangladesh nung Jel Bangladesh telok nokdanga aliba agien

Dhaka, Luroi/August 28 (Agencies): Bangladesh nung Jamaat-e-Islami Bangladesh, iba indang student wing Islami Chhatra Shibir aser sendaktepa aliba lokti tentet nem tenokdangba agüja aliba Bodhbarnü interim government ajanga agentsüogo.

Sorkar indang Interior Ministry ajanga sangdong ka nung iba osang ya agütsü aser iba sülen Emir of Jamaat-e-Islami Dr. Shafiqur Rahman ajanga osangbener senden ka nung nung jembidang nüchiso asoshi rarar temi 1971 küm Pakistan yimsüsüba nungi Bangladesh nüchiso ngutsüba tenüng sanga liasü.

Tenokdangba tatem kati aruba ajanga Bangladesh nung Islamic party asoshi yimtenren tsütsü lenmang ka lapoker.

“Sorkari kiralongra aser Jamaat-E-Islami Bangladesh,

par student wing Islami Chhatra Shibir aser sendaktepa aliba unit tem tsüngta tesendaktep tejangja kecha mongutet. Anungji sorkari Jamaat-e-Islami Bangladesh, Islami Chhatra Shibir aser Jamaat den sendaktepa aliba unit ajanga kiralongra nung shilem mali ta amanger,” ta Interiro Ministry ajanga sangdongba nung shia liasü.

Iba tenokdangba agentsüba ajanga parnoki Bangladesh yimtenren nung shilem agitetsü aser linük nung taruba general election agitsü atema jembishinüba nunga shilem agitetsü.

Jel Bangladesh, Shibir aser parnok den sendaktepa aliba lokti tentet nokdangba ya August 5 nü chirepba Sheikh Hasina'er sorkari inyakba mapa tatembangba liasü aser iba sülen Hasina ya India-i jena ao.

(Maneni tapak 8 nung...)

Uruguayan football asayar Juan Izquierdo süogo



Sao Paulo, Luroi/August 28 (Agencies): Sao Paulo nung football asayaba mapang laoba sülen anogo pongu lir Uruguay nung football asayar Juan Izquierdo Mongulbarnü Brazil nung mozüki ka nung asü. Pa arishi küm 27 liasü.

Sao Paulo nung laiba Hospital Albert Einstein ajanga sangdong ka nung ashiba agi, Nacional defender ya cardiac arrhythmia dak sendakba “cardiorespiratory arrest” asüba sülen aonung 9:38 ako (par mapang) nung asü.

Taoba Brehostibarnü Sao Paulo nung aliba Morumbi Stadium nung Copa Libertadores soccer match ka nung Izquierdo laoba sülen mozü kidangi anir ao.

Uruguayan club ajanga social media sangdong ka nung Izquierdo asüba ajanga ozü mulungjang shiranger aser melentsü makokba tesama atema Nacional mang ayimer, ta ashi.

South America nung football asaya ketdangsüba tentet, CONMEBOL-ia pa nem akhum agüja liasü. CONMEBOL tir Alejandro Dominguez-ia Juan Izquierdo anojungi asüba asoshi kanga sasar ta ashi.

“South American soccer mang ayimer,” ta pai ashi. Uruguay, Brazil aser Argentina densema danga federations temi asüku lemsatep.

Hombarnü sangdong ka nung mozüki indang doctor temi ashiba agi, ‘intracranial pressure’ tali akumba ajanga Izquierdo ya neurological critical care nung yua liasü. Deobarnü nungi pa ventilator nung liasü.

Izquierdo indang tsürabortem aser Nacional executives tem Sao Paulo nung mozü kidang liasü ta ashir. Izquierdo ya kibong kumer aser tanur ana lir, aser tanubosang ya August ita tetenzüklen aso.

Uruguayan national team

nung asayar temia asüku lemsatepogo.

“Temulung shiranger, jashir, rasaa ashitsü tasak. Pa tesunep nung anisüngzükjangma. Par kibong aser tembartem nem tashi agüjang ta sarasademtsür,” ta Inter Miami striker Luis Suarez-ia ashi.

Izquierdo temang majungba mechi Uruguay indang first aser second division soccer leagues taoba hopta tatemlen thinena liasü.

Sao Paiulo indang club-ia sangdong ka nung, “Onok anogo aika sarasadema teimla nung liasü, aser tanü Juan Izquierdo asüba osang angashia kanga jashir. Kinunger, tembar, külemi asayar, Nacional fans aser Uruguayan nübur ajunga den asüku lemsatep,” ta ashi.

Izquierdo ya 2018 küm local club Cerro nung asaya tenzük. Iba sülen pa Peñarol nung oa aden, saka pa aiben masaya.

Peñarol nungi Izquierdo ya Montevideo Wanderers-ia ao.

Pai kanga junga asayatetba ajanga 2021 küm Mexico indang San Luis pua, saka pa yakta Montevideo Wanderers dangi meyipa aru. Izquierdo ya 2022 küm Nacional-ia anik aser asaya ka asayaba sülen local Liverpool club dangi ao.

Liverpool nungi asaya tajungtem rongnung pa liasü aser 2023 küm Uruguayan league title ngua liasü.

Izquierdo ya taküm Nacional dangi meyipa shilang aser asayar tejen Sebastián Coates den külemi asayatsü meranga liasü. Pai taküm asaya 23 nung asayaogo aser goal ka yokteter liasü.

UEFA-i Cristiano Ronaldo tushitsü

Nyon, Luroi/August 28 (Agencies): Al Nassr forward Cristiano Ronaldo-i goal agütsüba benjonga aruyaa aliba season atema league phase draw sentong nung Champions League all-time leading scorer ama UEFA-i pa tushitsü sangdongogo.

Ronaldo ya European football yutsür season ana jungnüa aruaka goal agütsüba list amokbanga pai asaya 183 nung goal 140 agüja lir.

Portugal nung asayar tejen, Ronaldo ya Europe nung Sporting CP, Manchester United, Real Madrid aser Juventus amala nungi asaya arua tematiba jenjang nung pa den tokteper Lionel Messi dang goal 11 agi temaba aser tasembuba jenjang nung alisang Poland nung Robert Lewandowski dang goal 46 agi timba nung lir.

“Cristiano Ronald, UEFA Champions League nung ‘all-time leading goal scorer’ ajanga alima nung tematiba tetoktepa



nung kongshiba temaitsü UEFA tir Aleksander Eferin-ia sempet balaka agüja tushitsü,” ta UEFA sangdong ka ajanga ashi.

“Ronaldo-i Europe indang premier club competition nung küm 18 dak tema nung takok balala anguba ya inaugural 2024/25 UEFA Champions League 36-team league phase draw sentong nung tushitsü, koba August 29 nü Grimaldi Forum, Monaco nung alitsü,” ta sangdong ajanga ashi.

Portugal forward, Ronaldo yagi Manchester United nungi UEFA Champions League khen koka lir aser Real Madrid nungi pezüben akok, anungji 1992 sülen iba competition nung

ponguben takok angur mezüngbuba pa akum aser UEFA Champions League finals balala asem (2008, 2014, 2017) nung goal agütsüteter tanü tashinung pa dang lir.

Ronaldo ya Champions League season balala tenet nung goal timtiba agütsüteter ama asayateta lir – Manchester United-ia 2007/08 campaign akokba nung goal ti agütsü, 2017/18 nung Real Madrid-ia asemben buba atonga title akokba mapang pai goal 15 agüja liasü.

Champions League season ka nung goal timtiba agütsütetba record pai bona lir, shibai 2013/14 nung goal 17 agüja liasü.

Ballon d’Or aser UEFA Men’s Player of the Year sempet aiben nguteta alisang ya UEFA club competitions ajak nung ‘all-time leading scorer’ (145 goals, 197 appearances) lir aser Portugal asoshia 212 ben asayaba nung goal 130 agütsüteteta lir.

BENDANGLI OSANG : Tapak 7 nungi...

Israel mitkari West Bank nung operation...

Israel mitkari osang tejangja mashi saka sangdong ka nung IDF, internal security agency Shin Bet aser Israel Border Police forces temi kiralongrar tem aridoktsü atema Jenin aser Tulkarm nung counterterrorism operation agitar, ta ashi.

Palestinian Authority indang tir asoshi odongtar Nabil Abu Rudeineh-ia ashiba agi, Israel-ia Gaza Strip nung raraba den külemi ano occupied West Bank nung yimti, yimtsüng aser camp tem tali amakba ajanga lendong timtem tali akumtsü.

Tanep züngia lia nungi Israel military operation ajanga northern West Bank nung nisung toku tepsetogo aser aika yiruja lir aser ibai Palestine nübur, par li aser temeshi tesemtem anema raraba lir, ta pai ashi.

Israel-ia tensa tamajungba kumdaktsüba tasa, yimtitem samatsüba, nüburtem tepsetba, apuba aser colonisation ajanga shinga nema security magütsütsü, ta Rudeineh-ia ashi. Pai US dang tekeraba nung

Israel ketdangsür temi Palestine nübur anema raraba anendaktsütsü ayongzüka liasü. “Region aser alima ajunga nung tensa mejungi kimdaktsüba extremist sorkar azüoktsü atema alimai tekeraba nung mera agütsüla,” ta pai ashi.

Gaza nung rara tenzükertang tashinung nisung 40,534 tepsetogo, ta Gaza Strip nung aliba Health Ministry ajanga ashi. Kasa mapang nisung 93,778 yiruogo, ta ashi.

Tesüba ghonda 24 tsüngta Israel sepaitemi nisung 58 tepsetogo aser 131 yirutsüogo, ta ministry ajanga ashi.

Bodhbarnep Nuseirat refugee camo nung Israel nungeri tayimtsü amshia amakdang photojournalist Mohammed Abd Rabbo aser teyi asü.

Gaza aser occupied West Bank nung October 7 nungi tenzükta Israel sepaitemi osangbener 161 tepsetogo aser 16 yiruja lir, ta Palestinian Journalists’ Syndicate ajanga ashir. Kasa mapang osangbener 51 pua lir.

Rara tembangtsü atema Zelensky-i Biden den...

Rara tembangtsü atema Ukraine asoshi Russia-ia temzüng yanglutsü Zelensky-ia khenyongi magizükter.

Putin-ia tezüngzüktep kechi yangludir yangluaka Ukraine-ia ground nung asangsang tia agizüktsüla ta Putin-ia ashi aser yanghi Russia-ia Ukraine indang region pezü aser Crimea agütsü dena lir. Tang Ukraine-ia Russia indang Kursk region nung alinük 1,200 square km (463 sq miles) dak tema amokbanga lir ta ashir.

“Putin den atsü-anem malitsü, tanü jembishinüba ya tazüngla aser tetetzü maka, kechiaser pai diplomatic yimya nung rara metemner,” ta Zelensky-ia

osangbener dang ashi.

Kursk region telungi ia amakba ajanga alima nung aliba sorkar balalai Ukraine dang rara anentsü atema Russia den atsü-anema jembishinüang ta ashiba ajema kumogo, ta pai ashi.

Pai Kursk region nung Ukraine-ia settlements 100 amokbanga aliba indang jembia, aser külen Russian sepaitemi anüdoklen Donetsk region nung maneni alinü agiyonga arutar.

Kyiv indang domestic weapons production nung maneni terenlok lir aser linük nung yangluba ballistic missile mezüngbuba tendangogo, ta Ukraine leniri ashi.

Bangladesh nung Jel Bangladesh...

Tenokdangba agientsüba sülen Jamaat-e-Islami ya old Dhaka nung Moghbazar kiyong nung aliba office lapoka maparen balala inyaka liasü.

Dr. Rahman-ia osangbener den jembidang, “East Pakistan kübok asen Bangladesh ya Pakistan nung shilem ka liasü, aser iba mapang asenok mezüngmeshia amshi. Asen nüchiso anguba nung yarir freedom fighter tem bilemteter. Parnok nem ni akhum agütsür,” ta ashi.

Jel Bangladesh ya Jamaat-e-Islami nungi jakzükba lir, koba August 26, 1941 nü Lahore nung tenzük aser Pakistan mesadangtsü bhukuma liasü aser 1971 Bangladesh Liberation War sülena iba atema sentong balala

ayongzüka liasü. East Pakistan nung Ghulam Azam ya Islamic movement lenir liasü. Ghulam Azam ya war criminal ta sangdong aser tepuokdak lia asü.

“Yimtenren ajanga asen linük tia latettsü. Asenok ajaki asen nüburtem taginüba ngutettsü asoshi pei jenjang nungi merangogp. Saka ni ya akumtsübooa ashir, asenoki item tayongzükbatem mokoktet,” ta Dr. Rahman-ia ashi aser media dang Jel Bangladesh dak mebandangi rangloktsü ajungshi.

Bangladesh nung Muslim, Hindu, Buddhists aser Khristan aser danga tamangba yimsü tilatem lir. Asenok ajak lungjemer Bangladesh nokdaka lir ta ni jangja-jangja ashir, ta paisa ashi.

BILEMDANGANG

“Dangar yariang, saka na asoshibo bendanga agüjang.”